

摘藻堂四庫全書薈要

集部

欽定四庫全書薈要

集部

御選元詩卷十五

詳校官原任主事_臣李斯咏



欽定四庫全書薈要卷一萬八千四百二十七

集部

御選元詩卷十五

五言古詩四

馬祖常

都門一百韻用韓文公會合聯句詩韻

返躬操耒耜奉身寡帷幕田居水春磴城宿霜鳴折凝
塵尚沈冥幽賞任飄泊行歌鮮同歡起舞真獨作嘯詠
氣頗雄攀躋力或弱樛木植幢蔭醜石掀獸惡心恥婦



女仁志薄游俠諾校書楊雄官入粟卜式爵娛情愜禽
弄失意被蜂蠶佩履侍殿陞觚牘宴館閣傭童飼棧駒
賤婢占屋鵲上書願封禪監祠議嘗酌紅瓔綴花房碧
刺胃叢薄春旗天仗浮秋駕星河涸補衮子何能懷祿
我所作英名襲蓮炬貴籍謝魚鑰造謁每赧然循默譬
沃若壁蝸涎篆歌穴蟻戰壘却組繡紅縷連菴畫翠色
著卿雲冪邑屋瑞雪塗郭郭羣儒脩麟經諸將宣豹略
請劒斬樓蘭傳檄喻邛笮賈區紫貝粲酒鑪銀甕鑠潑

刺鱸翻砧郭索蟹就縛水戲鬪魚龍山蒐獻熊獲奇服
燕姬姪獠語滇童愕東郊買鬪雞西市賣馴鶴宛宛綠
項鳳濯濯紅頭雀豪僧佛宗開大巫鬼物託迎祥有時
和驅厲無旱虐漕粟大庾盈賦結崇廡錯圈虎割肉喂
講鷹搏禽嚼荔丹貢甌閩橘顆苞沔鄂能賦皆鄒枚飛
翰盡盧駱未央曲累愚長楊市羽繳閒棋遇笑仙雜劇
坐忘癡飲飛頭虎毛刑官面瓜削朝儀徵魯生廟獻賓
商恪天池漾文波海島通潛壑婦功春蠶溢穡事秋田

獲器美鏤桐梓冶良鑄錢鑄街樾布虛陰觀闕翔寥廓
治廷播訓救清邊禁剽掠窮髮炙馳蹄句麗醢熊脚詰
姦鉏大猾恤隱發深瘼靈圃白獸游禁籞黃鵠落時方
追古治事乃繼疇昨巢櫓尚羊裘革門仍葦箔周封表
鎮望禹畫首河洛聲名惜馬纓音律辨牛鐸郎署紆銀
艾王卿施丹腹轍浚千車馳塵坌萬馬躍碣石入渤澥
太行分嶺粵士女工鞏絲王孫帶河橐清明日月懸統
正宇宙拓分行下觀風立聽上宣噩服官綺纚屬虞衡

鄴旁魄牯脯販澤國乳湏給沙漠木禾神所食石蜜刀
乃斫天樞夾杓垣日畿絡雄莫鼎豈以金鑄山豈以銅
鑿戴憑席重重周舍言諤諤錫宴屬在鎬咸秩巫祠霍
造邦象郤室立法簡漢約吾生類鳬鷺賤迹雜兔貉囊
書爛星芒匣劒瑩霜鏐雨耕耜頻耨月斲石或搏尋真
養三芝求方問五藥傳奇存山經輿地指井絡悠悠秋
翦菰晏晏春食藿親歡戲假面客至樂吹簫恃才頗優
游使酒漸諧謔山深木敷榮野迴鶴寂莫擔簦踏槐黃

疊袂聯棣萼移官居旂常職領專錚鏘遮塵帽頂席隨
俗屋蓋窮俸錢具俎醢飲餒嘗膾臠孤危衆易傾獨立
古難卓徒跣防毒蛇空拳困狂狴出敝季子裘入舍居
士儔海運知化鯤泥蟠見屈蠖門高譽荀龍才逸薦禰
鴉逍遙投壺歌慷慨擲骰噓有興即騎行無疑豈龜灼
俎豆觀揖讓賓介謂獻酢風樗李涵冰日幌櫻裛酪鄰
飢馬通爨市醉羊屠醵耘德鈔礪刃稱藝弩引曠任情
受世疵肆志探古博奏賦始中程諫獵終失度不念殘

恤緯已謂童舞勺寢興避彈射周折準規黻襍被丘中
琴揚舲池上酌桐孫迸空枝竹穉穿石籜南翁日種漆
北地日產柞蓄厚用不躋材衆工豈格甘泉祠猶清西
河居乃索菁莪採衢謠湛露興徒号帝仁載大輿臣詩
埒微爚史官詳纂記儲以掩甕粕

自注詩中有三字非
元韻蓋祖常荒學不

能用古韻故也延
祐五年八月作

壯遊八十韻

十五讀古文二十舞劒器馳獵溱洧間已有丈夫氣裹

擢上嵩高靈竒發天祕
熒熒三秀芝為我擢
粲翠空青丹銀品伏
龜鏤文貝駢羅星辰
精附麗日月會紫鳳
友朱鷺翩翩劇翔戲
飛閣舒鳥翼懸泉瀉
珠琲磨崖見古刻應
是列仙記捫蘿欲登
觀苔滑阻凌厲煙霞
薈蔚隳霧雨蕭颯至
余時戴籜冠綠壁照
縞袂擅樂有磐石真
人每同憩北臨黃河
水濁流觸天沸蛟龍
逐黿鼉鱗介滿水裔
衝波崩金隄萬夫廢
穡事官家憂其勞玉
馬歲沈祭江淮畫鷁
船夜上訶嘒嘒魚鹽
不直錢寡婦豈拾

穗釀酒相呼飲顛倒再拜跪中心忘嗔訶縱談詆漢魏
三十能歌詩鄙薄雕蟲技不肯學仕宦慷慨負高義持
錢送酒家觴至即一醉羹芼嶰谷筍飯煮山陽糴我冠
擬魯儒短衣真楚製遠行探禹穴六月剖丹荔巫峽與
洞庭彷彿蒼梧帝三吳震澤區幼婦蛾眉細唱歌攪人
心不可久留滯沿淮達汶泗摩挲泰山礪聖鄉有亡書
求道亦容易童子操觚牘價重麒麟罽京國天下雄豪
英盡一世舞羽肅文教橐甲飾武備馬跡見騰塵車轍

聞戛轄輦騫天觀起鱗雜井屋綴千畝開靈潢馴象浴
其汭我皇拓文場羣髦咸戰藝汨予黔婁生言辭罔締
繪但幸鼃董死收拾在等第臚傳下閭闔恩澤承滂沛
春雲覆林塘雜花懸火齊詞垣正舒華吹竽獨無喙執
筆御史府羞縮如牡蠣彈評則春秋齟齬失剗剗問俗
西夏國驛過流沙地馬齧苜宿根人衣駱駝毳雞鳴麥
酒熟木枰薦乾薺浮圖天竺學焚尸取舍利安定昆戎
居貪鄙何足貴返途厯邠岐原田表古畷宛宛陶穴民

艱難謀樹藝驪山奠秦魄茂陵迷漢寯黍離悲故宮脩
竹編清渭日入狐狸驕天陰蟬螻翳溫泉山津陽古瓦
識唐宇關河隔山東華岳秋更霽首陽餓夫薇霜露已
憔悴鑄牛挽浮梁恍惚水所噬晉俗棗齒黃冀馬電蛇
駛井陘阨坤維太行逼象緯煌煌日圍近赫赫天人瑞
田舍植汶篁郵亭擷吳桂優游逢化國俯仰詠樂歲豈
用百二險自乃十一稅北都上時巡扈蹕浮雲騎宴鎬
帳殿移拜洛周廬衛巖空山櫻繁川曲紅藥膩列障敕

勒塞萬里靜烽燧九節菖蒲良貢篚充藥餌疇昔閉戶
居耽讀未見試三年不窺園自謂五經笥四十得俸祿
僅可給美饍誰能薄淮陽不作鴻臚寺簡書畏懷歸弘
矢示初志振鷺方擢質冥鴻忽垂翅感歎對囊螢興言
友荷蕢諒非廊廟具頗異市井輩當曳鄒陽裾願擁文
侯簪

贈客

疊巘擢蒼蔚繁英粲紛葩銀繭霞已積翠幢柏方遮劇

飲肆豪縱清談宴賓嘉
叫嘯虎當巖趨蹌鶴行沙
聯蛾聘趙女貫珠唱吳娃
露庭汎蘭叢風闥透窗紗
魚泳文波圓禽翔喬雲斜
逸樂諧金石清真况煙霞
洗藥秋澗種秫春燒畬
寓言託莊列潛心著義媧
所貴丘園賁終然心匪遐

西方樂

魯郊秋已深西樂多蒲魚
日暮積靄重維舟月生初
露涼水禽宿雨晴豔芙蕖
擷花結楚佩宛若湘南居

春雲

高雲起城闕流離度庭樹依風拂迴塘波瀾光影注荒
林帶疎煙照日亂縈縷婉孌連浮陽空明映淒霧嵐翠
含玉暉景采滿巖嶼逍遙幽賞諧緬邈世娛阻

端午效六朝體

脩篁發秀林新荷疊芳池采絲櫚霧縷紗縠含風漪
賓應樂律端陽正歲時馥馥蘭湯浴澹澹蒲酒持漢宮
鬪草戲楚船張水嬉江心鑄龍鏡好用照湘纍

初日二首

初日照我樹我樹日華滋檀欒綠陰合四顧無曲枝盛
暑熾煩歎其中有涼颼成林蔭千畝棲息任所宜

初日照我書我書在東牖赫矣先聖言天地相永久秦
火雖燎原其灰為世壽人文待茲成老死學敢後

擬古

長安青雲士任俠日娛遊千金為人壽萬金買名謳小
舅拜郎官女嬀恩澤侯出入意氣盛歡樂不知憂銀枰

薦海品羊酪乞蒼頭生逢承平世死葬崑崙丘

登都北神山醉中題壁

過溪踏瑤瓊入山采蒼翠仙宮名神山下負六鼇背我
來訪丹藥羽人已千歲清嘯響山谷幽姿媚松檜白水
從北來南與衆川會開窗目沃野千峰儼相對自是山
林樂何但官爵貴買田釀清泉里社日相慰詩成悵如
失天風逼衣袂東望鄒衍廟杯酒可遠酌談天劇當時
古屋尚粉繪騎驢獨歸去人世空一喟

種桃

種桃南山麓三歲不得實種瓜東郊園擷之在百日豈
不思遲暮終焉有常食如何種瑤草千歲始一獲

度居庸關次繼學韻

飛鞚陟雲巘決背盡圖畫天氣吹高寒山雨灑長夏冥
冥白鳥去寂寂松子下陸行石當途水春泉繞舍高與
蜀道齊深乃盤谷亞筍輿約重來羸馬苦常跨朋從詠
連疊酬應給閒暇得見王子喬吾將驂鶴駕

張起巖

遊金牛山

余生愛林壑夢想雲水間
倏然外塵囂俗類每相關
一行墮世網著脚多阻艱
回望故山雲逋客幾汗顏
逖矣古肥城岱麓空翠環
有山名鬱蔥秀色青雲端
中藏古招提簷戶擅林壑
我來脫塵鞅幽境窮躋攀
層岡列屏嶂曲徑穿荆管
壞橋擁流水激石聲潺潺
山門勝雄視殿宇凌高寒
椽楹矗青瑤文風餘朱顏
斗拱鏤珍木金

碧紛爛斑老柏數十圍枝柯駁蒼頑石泉湛清冷古洞
秘神筌境與心迹清恍若遺人寰同遊二三子欲去還
為言迫春初暖日未足稱奇觀首夏山櫻熟紅珠瑩堪
餐佳樹影清密好鳥聲緝蠻松露墜青滴巖雲擁髻鬟
煙蘿罩虬枝靈草封法壇晴嵐新雲餘飛湍瀉碕灣聞
之灑然笑襟懷豁幽閒更愛讀書堂當年萃衣冠中有
摧桂仙聲名藹朝班健筆壯精舍盛事留茲山便欲謝
簪紱眠雲弄潺湲午風鳴素琴春醪灑清歡題詩約山

靈莫云迂夫孱

貢奎

敬亭山

名山鎮宣郡古祠崇敬亭傑構靚深巖飛廊引重局陟
彼百仞高始覺萬類形樓殿勢益弘兵衛森幽靈增秩
觀隆典綸音播明廷豐穰走祈報煙燎浮芳馨竹樹蔽
險豁虛闌俯南垞麻姑湖上碧華陽天際青神飈颯然
起新涼濯微醒疎雨映白石垂虹截蒼冥永言李謝遊

豈惜歲月零悠悠孤雲去渺渺從雙輶招之殊未來莊
思展函經

答陳華仲

海上三神山上有學仙侶泠泠紫簫聲吹作飛鳳語迴
颺蕩溟海散落成煙雨豈無知音者一振九苞羽持之
獻天庭上以奉明主

夢故人

千里萬里道三年二年別鴻雁去復來我友音書絕夢

中忽一見款語情更切覺來失處所殘釭半明滅相思
各天涯長夜寒慄冽風霜草木變貧賤不易節中心諒
誰知素月當空潔

題董簡卿所藏瀟湘圖

瀟湘在何處展卷心悠然是中有雲飛上與蒼梧連憶
昔弄扁舟載雪清江天湘君招不來明月隨我前微鐘
破征夢落雁棲寒煙回首行萬里攬衣羨孤寡可憐楚
人辭樵悴窮歲年圖畫豈不好此意誰復傳已矣三歎

嗟臨風叩商絃

夜坐

京國雨初霽虛堂夜氣涼
新月上團團坐久流清光
露葉閃明晦河雲互飛揚
機籟發天祕起弄琴與觴
千里同今夕幽愁結中腸
濕螢低復舉棲鳥亦驚翔
適時物乃貴人生何慨慷

雪晴

今晨持我書燕坐雪照屋
閉門謝塵鞅展卷自朗讀
衆

說初若攻冥思意纔復旭日上團團清泉渙春綠涓涓
晴欄溜洗眼濺飛瀑豈不事游觀驅車泥及腹永懷同
袍士歲晚在空谷好風忽東來起翫庭前竹

題陳氏所藏著色山水圖

獨卧曉慵起夢中千萬山推窗煙雲滿一笑咫尺間
媚美人妝金碧粲笄鬟素波淨如鏡綠蘋點溪灣美哉
筆墨工貌此意度閒孤禽立圓沙漁舟遠來還我方厭
闌市坐對忘朝餐安得林下扉深居長掩關

茶蘼架

西園檢春事積雨斷餘紅茶蘼壓高架皎皎晚日烘翠
蔓點殘雪清香度微風幽人對之坐瑩然此心同徘徊
不忍去片月來高空宛如萬玉娥素袖舞雲中珠璣露
顆綴翠佩煙光籠愛花不愛折枝柔刺盈叢攜酒醉其
下慰此良夜終

宿鳳口會九萬兄

扁舟下滄溟日暮浮雲散青山衮衮隨十里行不斷古

屢集人煙艤纜臨絕岸誰知兄弟情邂逅忽相見篙師
輕波瀾呼嘯驚夜半貪程慮涉險欲往還自筭推篷視
天宇白露下凌亂衆星亦已沒落月破微暗念此局促
身倏然重三歎

河上阻風次韻袁伯長

奔河逆牽舟北風忽中阻篙師勇支撐騰躍勢如舞塵
沙晦高旻泥水汙后土電飛起潛蛟樹拔亂驚羽須臾
西日霽雲端散紅縷維此造化工而我獲窺覩故人適

同懷破險出奇語明朝穩張帆萬里端自許

送九萬兄之樂清主簿

宿雲澹朝暎春風散輕寒振衣既行邁慘別情所難王
事勞蹇蹇征車戒桓桓孰云枳棘微蔚此五采翰海縣
還靡俗濤江激迴瀾道路豈不遙懷居誠匪安勗哉西
都秩願言繼彈冠

送張謙仲南臺御史

仲夏炎氣盛江河沸焦燉層雲張虛傘電光掣金鰲旱

魁奮為虐九土民嗷嗷矧茲東南區颶風挾驚潮漂流
孰可禦弊積成瘵凋側聞我多冠遠策神驄驕冰蘖期
素守風霜厲嚴操譬若激清冷慰彼方渴消憂私隱田
里吏牘上下膠要當得其情察察窮秋毫金陵古佳麗
地控荆楚遙翠栢集飛鳥蒼鷹擊秋郊臺端咫尺天明
月手可招勗哉重明德山岳非云高

度呂梁洪

朝發下邳山黃流沂迢迢呂梁開險關懸河傾奔號南

通廣越疆琛貢來千艘連檣駐其下祈賽聲啁嘈岡環
岸勢側廟奠巖陰高橫灘絕東注亂石不可篙嶙峋布
戈戟屈曲蟠蚪蛟湍飛稍旁激盤渦散驚濤脩纜危一
綫千鈞泛鴻毛凌虛獨凝睇屹若登雲霄寒雲暗暝蟄
落日搖金鰲我老才氣薄搜吟愧前豪神京望何極輕
颿競羣飄

沙河

沙河冬欲涸流淺日以急膠舟不可行念此勞苦劇巨

鯢魚貫尾小艇纔轉折褰裳力推挽進寸還退尺呼嘯
畚林谷蕩摩激沙石前瞻充泗源高堰限通塞啟牖暴
漂浮絕岸駭平溢篙檣起紛拏跳躍如奮敵安流心稍
舒十里慰行役舟人忽相告上牖晚仍隔官程急方貢
陸輦空委積永念平水功豈遂一朝適壯遊俟時來欲
速非我力郊連秋草黃日閃霜樹赤孤村隱溪曲聊以
供散策白雲山嵯峨矯首三歎息

河流冰

十月寒氣盛長河流冰漸征艤泝浩浩鉤曲苦逶遲
漾圭角露稍沍還參差恍疑戈戟森出沒相傾歆或員
如墮礮或利如鈇鎚須臾驟風激瓊瑤積山危檣櫂一
衝擊糜爛不可支窮陰生極底乃見造化奇履霜固知
堅物序矧及期行役何未已君子宜慎思豈無冠蓋華
揮霍遵大達千鈞載車轂絡繹駟馬馳覆前罔戒險隕
身悔何追我昔居南州感此日未窺竭來二十年戰兢
常自持終當挂高帆春洲揚綠漪

訪渭口葛秀才因題其壁

山盡江勢急江迴護平林中有隱者居樹木敷清陰推
窗萬里適快我三年心摘蔬薦濁酒拂石題新吟醉來
縱言笑起坐臨淵深魚鳥亦遂性向人自升沉斜陽忽
滿地引杖窮幽尋主人樂未足明朝期抱琴

次韻年成甫

我屋青山下江淨餘霞赤三年卧憂患迹絕城府入扁
舟乘興來獵獵風滿席豈無知心人邂逅談燕集撫物

空自嗟白鷗亦閒適虛名苦勞生于事竟何益

許有壬

神山避暑晚行田間用陶淵明平疇交遠風良

苗亦懷新為韻十首

錄五首

田塍晚獨策及此時雨晴東畦與西疇決決流水聲豐
年已足歡清風復多情歸來藉草坐濁酒還自傾不用
澆硯磊我懷無不平

寢迹非絕世雅志便林丘青山足一至勝處靡不遊意

適輒忘返茲焉夏已秋遙遙目力窮青青盡田疇迷復
幸不遠歸歟無異謀

落日照我影頎然溪水中涼飈動絺衣勢欲凌虛空顧
之一大笑與爾將無同昔也爾何達茲焉爾何窮莫道
山林陋乃有黃虞風

昔人植松柏映蔚彌崇岡不為朝夕利千載當自長植
槿非不榮我圃因之荒白髮走畏途途修馬非良桑榆
賴未晚此樂且無央

我髮日以變山色日已新舉杯試問山古今閱幾人我
非山主人聊為山之賓杖可入幽險詩能寫清淳但恐
我他適山乎爾誰鄰

和虞伯生學士辟間韻

在公抱隱憂出塞得竒觀青山萬馬奔龍門忽中斷地
平豁四維天闊張一幔寄語鳴笳兒休驚暮鴻散

九日登鳳寧山

亭亭鳳寧山形勢若飛動胡為不飛去仙真此搏控靈

跡既不閤煙霞遂增重城居見其圖清賞時入夢本朝
事幽尋霜風肅飛鞚適與佳節會更與佳人共危亭構
兩翼飛雲連畫棟翠柏瀉秋聲紅樹列清供遐觀千里
近長歌百杯送洄流嗽其根俯瞰清可弄陟降自忘疲
酬酢益豪縱牛山何用悲茲方待鳴鳳

許有孚

嘉蓮亭宴罷奉陪泛舟夜分始歸賦詩三十韻
是日之宴渤海縣尹吳安之以使來具也時閏

七月二十一日

池亭秩芳筵落日船始放晴空散餘霞秋水淨氛塊高
荷雖離披尚爾綠彌望寥豁成壁池不礙雙槳盪縈紆
湛澄碧天宇益虛曠石竇來驚湍松隄俯新漲鼎立洲
嶼連沿洄時一傍釘餽羅珍羞傾倒出奇釀侑以二名
姬朱絃倚清唱凝雲響空翠幽禽或胡胡所媿杯行遲
負此百川量須臾羣動息露氣白沆碭灑然毛骨輕不
獨情緒暢燈火空濛中仿佛江湖上陋彼西園游飛蓋

何冗長云胡漢陂行亦復怯風浪而我方扣舷馮虛恣
搖蕩吾兄嚴鄭流高節張邴亢少飲如醉翁浮此齋畫
舫頗恨交游稀每每折輩行遂令子弟間日侍屨與杖
樓船憶當年樂事炊一餉望洋失所操伏櫪今在鞅靜
言校疇昔所得多所喪與從天上人何似山中相但恐
時易失俛仰異欣悵銀漢淺且清神槎喜無恙人生貴
適意前脩語非妄榜人報更闌列宿光蕩漾故舊東海
頭何當剡溪訪

王結

泗濱堂為蓋善長賦

乘槎沂河源崑崙高不極揚舲浮沅湘重華阻靈覲興
言游汗漫千里一瞬息靈氛訢吉占歲晏果何適遄歸
泗水濱築堂俯晴碧優游弦誦餘燕坐儼澄寂川流映
天光翔泳咸自得悠悠千載心寥寥竟難識

趙世延

覽蘇溪湖待月南軒墨蹟白雲觀即景用韻

凜飈集庭樹秋氣殊未肅
扶雲度崇岡訪古瞰巖谷
午茶琳宇琴清致超冰玉
魏爾白雲人幽棲非碌碌

魏必復

百門山

建瓴視中原清輝天下最
井邑抱林泉靜深兼秀麗
靈源遡方輿漕輸歷年歲
杭稔厚人生碓磑具神惠
奠祠扣瀛海飛薨闔黠霽
雲雷泣鮫人礫石動鱗貝
溪出驪龍珠爛瀉海藏秘
滌慮鑑湖明齊心辟氣沴
湧金儼百

泉芙蓉媚薜荔淨消香坐隅解愠風衣袂沉迷簿領間
漸息登臨際閭閻遠近民煙霞咫尺地躊躇旌旆還空
惚驚聲噦循循爾吏兵默默予心會諒非泥醉嗟公餘
可同詣

蒲道源

送府史竇彥立遷調奉元

藹藹府中英夫誰可屈指竇君長安人衆論共推美氣
和更敏才志銳方壯齒留胸無芥蒂出語有綱紀一朝

過我辭試問其所以廟堂立新法為吏互遷徙簡書迫
程期信宿不容止門當道途旁片幸還鄉里聞之心惘
然別緒紛莫理一杯送歸轡一言贈吾子人生重名節
不義深可恥青雲路雖高欲致由踐履去去宜勉旃好
音行洗耳

次德衡弟韻

古道不可作轉覺澆風長人心所去就但與時炎涼燕
石藏什襲連城遺路旁汝賢乃迂闊汝直成狂佯世味

鼎一鬻人爭染指嘗伊我澹無慮簞瓢身世忘處污奚
害潔視變皆為常彼哉聲利徒末路空皇皇

春晚山茶始開示德衡弟

山茶本冬花憔悴遂開晚儕輩鬪芬芳已獨尚息偃及
茲春事深渥丹始赫烜參列姚魏前正色無婉婉因之
觀我生平昔匪驕蹇衡門自棲遲臨老遇推挽朱紫皆
少年跡親心自遠華顛豈懷榮田里幸得返功名船上
灘歲月輪下坂撫樹三歎息歲寒同繾綣

文矩

和寧致陶幽懷

時雨息氛翳高林嘒風蟬端居愜孤尚圖書靜當軒涼
颼薄櫺戶微爽生簡編客來聊與樂客去自復眠徜徉
永今夕庶以全吾天

題中慶學廟壁二首

世皇昔仗鉞汎埽開八垠茲方邇彭濮同氣皆吾人祥
曦洞幽闇化雨清炎氛哀爾窮髮黔煦以天地春雕卉

襲冠帶鳥語同書文邇來六十載含哺知尊親人心異
禽犢適性非難馴吾聞古王政不以土役民季世乃夸
敘畦町逾紛紛七縱昧柔遠降女傷王尊吾元有至德
萬古欽皇仁

素王萬世師國經有常祀滇南古荒服薦裸豈異禮王
宮正南面溫厲思敬止豆籩具威儀登獻何纚纚升歌
永齊商琴瑟散宮徵共言唐法曲歲久復慙慙陋邦何
足徵居夷聖所儼於皇人文化道大孰與比六經如日

月洞照無遠邇敘秩敦彛倫百王同一軌邈哉天何言
悠悠正如此

送馬伯庸御史奉使關隴

聖朝啟文運同軌來無方夫君起天關崛起千仞翔修
辭陋史漢高步追黃唐乃祖尚書君樹立何堂堂昔在
帝世祖榮身事戎行風雲一朝會奕世傳芬芳矧君擢
高科有業未易量斯文繁政教治忽慎弛張世豈無勇
者舍君吾何望勿為守鉛槧局束徒苦傷

僦屋京城居去君百舉趾聞君起冠鴈僮走亦欣喜况
當遠於征無言詎能已朝風號空桑衆草日披靡河關
尚瘡痍聖度乃弘偉翳彼涵大休能不懷媿恥艱危見
臣節維持賴風紀溫言表遺忠生氣凜不死乃知烈文
夫豈獨魯連子

薛漢

和鄭應奉雜詩六首

茫茫穹壤間環海大州九壯遊不及辰坐待迫蒲柳窮

通付分定達識當順受但願薰風詩在在民物阜一瓢
安菽水吾計亦良厚

當年東山翁笑傲聊永日弓旌一朝下萬里赴星驛回
頭故山友十見秋柏實我我東觀中大書黑如漆想見
日暮歸沙輕馬蹄疾

淳風散已久青黃陋窪樽婉孌爭媚好役智空自昏豈
知葛天民無言道彌敦我有白雲操泠泠寄桐孫調古
識者寡幽探萬化源

驅車涉遠道日晏不知疲一見嵩華高始覺培塿卑吾
道麗天壤昭昭匪難知千金買刀圭但為方士欺贏糧
往問道去結汗漫期

志士方盛時危冠怒衝髮猛心石為開壯氣山可拔安
知橫江鯨中路螻蟻狎所以巢居子商歌竟不輟歌竟
寂無言坐聽天籟發

宦游夢入槐宴坐肘生柳出處亦何常臨岐一分手光
陰不可翫歲月坂丸走軒裳百年間竹帛千載後永願

堅素心舊學安敢負

和虞先生上京夏涼韻

登臺美皆春覆盆慘長夜誰能均苦樂世道勤汎灑
京逼穹昊重續度朱夏下方正喘汗歎赫在爐冶南北
各異宜敢訝行化者倦遊念苔雪漁竿自堪把

和虞先生箸香

奇芬禱精微纖莖挺脩直
炰輕雪消硯火細螢耀夕素
煙裊雙縷暗馥生半室
鼻觀靜裏參心原坐來
息有客

臭味同相看終永日

送馬少卿伯庸南祀嵩衡淮瀆

總章盛金德齋明赫當宁皇皇遣天使肅肅承聖語三
熏禮岳瀆萬里涉梁楚祝釐歸堯舜降神出申甫南斗
迎文星西風起儀羽樂張洞庭月旆濕湘岸雨壯吟鄙
騷怨高談洗儒腐過家猿鶴喜攬轡鴻雁聚青闈閔賢
勞黃屋深記注歸騎慎勿徐席虛玉堂署

送牟伯厚還雲

西風起雙鴻渺渺度萬山空林霜霰落各念飲啄難中
塗忽相失獨留諒無歡極目送冥飛風雲逸脩翰低回
守矰網自顧形影單奮翅念遠舉天路浩漫漫空想五
湖水春風漲波瀾

陳櫟

送汪希道入都

希道嘗為廉訪司照磨鞫洞
蠻獄以失出阻仕進者十年

行行觸秋暑勇往觀國光脩途或濡滯一瞬北風涼不
仕餘十年養親竈罕煬將謁吏部選寸祿願少償庶略

助甘旨贖其不遑將不仕果何因憲幕嘗翱翔驅馳海
南北訊獄主慈祥註誤陷賊黨詰問加精詳活千七百
人解縱還善良幾以失出譴究竟靡濫臧久之天日開
歲月坐荒荒濂溪范參父議獄俱慨慷殺人求媚人毋
乃欺穹蒼活千人有封君後必當昌安得當吾世而不
蒙薦揚當路願鑒之萱草癯北堂俾得早言歸為養及
壽康臨期重丁寧白雲遙在望

郭天錫

大年便面

疎雨灑荷氣微涼生柳陰閒亭不受暑坐占清湖心無
客且罷棋有風宜披襟向來行路錯足底黃埃深此意
一領略落日孤蟬吟

為僧作山水

有客被方袍合爪前致辭不獨愛公畫仍復愛公詩詩
成縱意書了此一段奇世人稱三絕公胡不自知我心
了不知晚歲聊嬉嬉向來用世心轉首成棄遺所嗟聞

道晚倏已雙鬢絲前賢去已遠來哲未可期寓形宇宙
間倏倏欲何之願誦藥石言再拜真吾師

趙千里小景

鸚鵡喧柳陰生鶯樂清泚竹風遞荷氣長夏涼如水王
孫翰墨仙丹青絕紈綺何當著幽人艇子沙頭槎

元暉山

灌木蔭滄洲閒雲疊層巘茅茨在咫尺徑路渾莫辨王
家玉印章翰墨屹冠冕悵望海嶽菴禾黍西風轉

營丘江山招隱圖

健枝無冗筆樹外來江山洲渚蘆荻空斜陽澹煙鬟歸
鞍倦危橋短篷止荒灣業漁古云樂寧論晉宋間菰米
蓴菜羹妻兒有餘閒坐令王李輩濡毫破天慳展翫不
去手綠陰掩柴關浩歌滄浪辭濯我塵土顏悠悠江湖
夢隱者招不還

題高尚書秋山暮靄圖

遠樹含空煙羣峰緘積翠離離雁外檣落日來天際高

侯丘壑心點墨悟三昧我欲畫滄洲畫長枕蓬睡

揭祐民

登鳳皇臺

西風埽建業六朝倏更代孤鳳何年來高臺此留待唐
家日方中憂旻深感慨宗臣裂肝膽片語到今在癡雲
起大荒事業果顛沛遺吟所鐫磨歲月又屢改梁園後
悲秋草草作南內登臺渺八顧潮落石頭碎禍亂有本
原臣子出忠愛夜深挹長庚江月為誰對

何中

菊

菊花如幽人梅花如烈士同居冰雪中標格不相似道
里阻荒寒故人萬里餘菊枝儻可折持以寄遠書

偶書

桐寒葉落風菊淨花開雨掩映半畦秋好竹三四五對
此憔悴人忽笑不復語

遊夫容山

十里五里石一步一長嗟行行山轉高悠悠日將斜
縈折抵深谷直下十數家來往自成村桃柳映桑麻
崖杉老絳葉石樓垂枯花陰凝四時雪陽燄一川霞
誰令余到此幽意浩無涯行將辦畚鍤來此耕山畬

峒峒青夫容峻秀琢寒玉危流千丈飛鏗鐫石相觸幽
閔魚龍宮荒寒霧雨蓄淒神不可留前登散遐矚參差
雜花動香氣泛深谷日照丹霞開萬峰洗晴綠同心有
長纜緩尋靈藥斲葛仙早見招庶得從所欲

葛仙曾
遊此山

側足上翠微石磴八九折開盡滿厓花坐來羣香歇遊
目盡遠空亂數碧簪列草木頗蔥蘢雲興復霞蔚不知
十日雨還長幾枝蕨山中無事業特用慰采擷盈筐歸
路遙忽見滿山月

日日碧山去香草生還蹋幽禽識履聲間鳴故相狎意
行不知遠清嘯得虛谷石上綠雲生巖下紫煙合莫負
今日晴聊折山花插

歲晚詠懷

門扃幽樹聲窗鎖羣峰影寒氣迎遙夜華星在西嶺秋
蟲無餘聲時雁有新警天機自消長冥參得深省名衢
萬里輟理海載孤艇力弱昧前馳心彊遡真境即俗幸
無能澹然聊自領

梅

一徑蒼苔深梅龍著花早初回天際春更覺江南好月
色冰霜寒角聲天地老寄語宋廣平時無蘇味道

九日

屬耳喧令序虛旻景清溫久生理難期陽德聖所尊菊
籬黃未拆萸枝綠初繁時萸尚青幽岵寡芳物離索誰相存
白日照杯酒壺山落秋痕高歌行太清海翳開渾渾倚
伏祥視履登高倦躋攀化機何由息悠哉委乾坤

秋日山行雜興

獨往非避俗散懷聊尋芳流風澹翠麓理策秋路長蒼
石含幽色樛木落寒香一片太古雲化為孤鳳翔忽然
歸紫霄蕩漾不可望浩歌向夕霽敢事接輿狂

山回杉燹清厓傾花雨下詎知吾道非偶然適曠野磊
落萬隕星赴流飲奔馬風微葉時落磴寒雪自灑孤松
縈蘿轉幽峰抱嵐炮景晦良遇稀心異真賞寡舉手謝
時人巖陰棲古瓦

箬嶺人家

溪回谷深盤石阨水成布風吹巖下雲挂在溪東樹雨
深兩岸花高下樓臺聚安知主為誰倚遍闌干去

儒學提舉司宴集

賤子久在野低頭事躬畊堂堂賢宰輔胡為知姓名許
辭庠序責復假賓師稱仰既慚簡書俯仍媿輿評公館
良宴會文雅有餘清粲粲珠玉質噤噤鸞鳳聲深意脩
綆汲雄辭四筵驚我衰但多感一出寧非輕白日照天
碧耿耿梅花明城南有歸路西山能送迎

贈元復初

暖雲流青堤光風轉芳甸遠在天一涯幽沈限聞見點
點秋歸鴻翩翩春來燕天路萬里通胡寧絕遐睠竒姿

奪南國悵望愧疎賤良會慰夙心願君畢歡宴

春風如少年效程漢翁

春風如少年狂逐無定處垂楊曲江堤細草東郊路祇
言今似昔不悟新非故流水何時歸殘鶯數聲暮

西湖山

峩峩西湖山靈秀入空碧蘿陰轉累磴松色漬幽石微
霞生絕陁飛溜灑歌聲鶴鳴巖光動花落雲影折危椒
登古壇百年此一息聲影混大荒不見興滅迹剛風三

天寒元氣萬里色
悵望仙子期凝神
撫元極

招仙觀

逶迤溪南路窈窕招仙谷
空堂兩道人殘棋映深竹
一葉響疎籬雙鴉啼高屋
出門隨歸人遠燒在山麓

知非堂夜坐

前池荷葉深微涼坐來爽
人歸一犬吠月上百蟲響
余非洽隱淪隙地成偃仰
林端斗柄斜撫心獨悽愴

遊樂安穆山寺

秋陰出南郭佳色來遠山悠然渡野水却宿前林間朝
氣銳幽步相攜上孱顏行穿綠蘿遠共愛青杉間已窮
高原路忽得雙石關飛煙帶香氣深木藏幽潺景晏鐘
磬寂桂花滿苔斑道人一尊酒時聽風珊珊多悟從此
始塵緣諒能刪空廊對微雨亦復不知還

宿田家

村暗煙火生林深雞犬靜麥花如積雪月色澹相映鄰
家夜汲歸寒蟲滿幽徑

小孤山

牽牛與織女河漢有時渡
小姑綠髮深隔與彭郎語
流水去仍回望郎郎不來
精神有相貫形迹難相猜
年華朝又暮江頭晴又雨
靈風吹斷磯行人聽鐘鼓

龍潭阻風夜興

水宿滯前期前津北風惡
林寒燈影深莎雞滿籬落
恍忽寄孤迥淒清愧離索
年光星河轉夜氣衣裘覺
我前勁翻翻我後大魚躍
潮痕侵柳根移船避沙閣

同鄉客

有認余舟者問
隆興消息焉

遙見江西船認是同鄉客何日發龍興迎人問消息長
河落雁秋古渡啼鴉夕不見楚天長重重暮雲色

淮安道中

鐘聲起前林悠悠向南客天垂大野高月澹行路白雞
犬淮上村雲霞海邊色舊時塞垣地來往人馳驛

南浦旅懷

鄉近歲已闌猶為候風客落葉蓋蓬深三日不知息浦

樹分城煙水明遠沙色滿筐紅竹枝渡人隔邨夕久滯
妻孥望孤還友朋惜音形兩睽離情生自難抑

朱方偶作

雪餘春水生日上暖雲泮杳靄松林中柴扉起樵爨新
妝攜童穉鄰曲欣年換坎坎邨鼓鳴沙頭酒聲亂江西
田家樂豐歲尤盛觀山市溪橋春還多看燈伴

丹霞洞天

飛鳥落丹霞蒼然洞天劃草木皆異香煙霧有靈色寒

苔潔宜坐幽水甘可滌樵子指峰賞野翁教藥摘琳宮
積筠陰慮消景難是道人供仙茗疊疊言所歷唐王懸
舊照唐帖式遺墨師年知幾何山前事多易稽首浮丘
翁歸歟紫元宅

黃溪口看白水

黃溪且緩程白水方迎賞石扇千餘仞雪源數百丈幽
光照天動寒氣發地夾松杉含清英猿鳥翫奇響仰視
蔥蔚中當得一席敞移家結香茅把書寄泉上

早起

覺來日已升花梢衆禽語何許白浮萍池間散還聚起
見梅已空夜來幾更雨魚行春到水草暖香生露溪上
人語喧樵薪滿沙路

洪都靈應觀榜雲徑

厭煩取蕭閒隨意入雲徑上堂敲響板山童質辭令地
寂室生涼體暢心逾靜出門看木陰佳鳴發清聽風光
勻可愛水色豔相映真契成自怡歸路得新詠城市今

滯留將無失幽性

新淦太平山

縱觀不知遠言登太平山諸峰卷秋雨日射風霏間懸
磴折古石側溪倒危潺金燈如丹紅異卉相爛斑忽悵
經丘絕俄欣尋壑閒筠陰聚森爽樵人指幽關聲鐘出
庵靄演梵作孱顏靜者足吾契語瑩冰珊珊厓東野月
上露華膏夜鬟松杉炯玲瓏流飈過瑤環既靜有餘聽
焉知趺坐頑偶然在塵表非能悟無還

崇仁鍾山寺

宋樂史侍郎
有詩在寺

方看望仙雪仍訪鍾山泉石限阨危溜峽厓減青天不
知路深淺但愛山蒼圓俄驚侈樓觀一禮黃金仙衲僧
喜客來觴行續茶煎仰視慈竹題俯吟慈竹篇前脩凜
高躅滋久餘芳傳白日倚山轉倒暈千峰煙悠悠思難
極且與樵風還

樾溪

林嶺甚可愛溪源無盡時山花已亂發煙暖東風遲因

與采樵者坐談樹陰移日斜
自歸緩我興非人知

樟樹鎮五公寺

久幽厭拘維暫弛欣舒散
近關得禪扉擇步歷蒼蘚
沈沈松陰重濫濫水光遠
殘花起餘香乳禽響新囀
虛廊清晝長高僧坐談簡
學空素所昧慮妄還自遣
移晷始知歸生煙滿林晚

風雨

池上風雨來柴扉人迹絕
隔水煙氣生林峰半明滅
蛤

吠秋草深魚驚晚荷折孤坐倚匡牀微紅隱天末

次韻甯志道表氏偕菴夜興

空庭山色重積此松桂陰微風從何來一鳥驚前林清
心有密契幽聽得遠音寒燈照孤館歲晏夜偏深

王禎

圃田

二頃負郭田人上寧易取數口仰成家片產足為圃遠
即加倍蓰多仍防莽鹵雖云絕里閭終得並城府幽可

尋山隈潤宜臨水許未始外犁鋤或亦事斤斧中可居
一廛外或興百堵請學擬樊須不如聞孔父業作灌園
翁籍古輸稅戶作計務勤劬傭工贍貧窶水種要漸濡
糞滋饒朽腐蔬茹間甘辛瓠瓜無苦瓠芄芄黍稷苗蔚
蔚桑果樹鬻利達市廛植木入邨塢界展陣圖橫區分
僧衲補隨分了朝昏無心富困庾高卧儘元龍信誣從
市虎閒看穴蟻爭靜聽井蛙怒偶爾閱物情居然為地
主進退綽有餘奔競恥為伍寸壤思康莊衆流獨砥柱

自我結蓬茅從渠愛簪組
畎畝著吾身乾坤留此土
陵谷幾變遷畊鑿一今古
四序轉軒楹八表際庭宇
造境到羲炎逢時知舜禹
柴荆敞昏夜桔槔憩煙雨
俱同動植甦忝與膏澤溥
斗酒一醉勸盤餐衆美聚
口腹麤能甘身形不知苦
養生誠足嘉報本非敢侮
五土既有神百穀豈無祖
齊祭奏幽詩歲時鳴土鼓
不務農務中是用紀圖譜

礪碑

他山有奇石鑄鑿煩良工制成三尺餘箕軸旋其中齒
齒銛鍔堅就彼硯塊功一轉土膏潤再轉春泥融輾輾
復輾輾妙用無終窮遙觀萬頃綠粼粼漾春風不辭處
泥濘但願歌年豐

耨

創物各有名耨器即云耨壅厚破蟻封啄深過鳥味護
苗如養賢去草類擊寇曾聞偃僂翁功母求速就

鏟

古鎗惟制小頗逾鋤耨功今於古制異用亦差不同溝
田壟畝仄他刃誠難攻製器度地宜創物須良工長柄
加闊首圓柄投直銍畝畝耀吐月肘腋凌輕風務進同
撞戈再前隨換蹤覆芟易反掌剗地深潛鋒已令土膏
潤旋看蔓草空要處薅薙外不離耘芋中養苗成此稼
去穢利吾農無田非力闢有具致時豐嘗見燕趙北亦
傳遼池東遠近或未識圖譜容相通

銍

制形類短鑱名義因聲聞總括既異賦禾藁惟中分雖
云一鉤鐵解空千畝雲小材有大用乘時策奇勲苟無
遽棄捐磨礪以須君

鋸

百鍊出鍛工脩薄見良鐵架木作梁橫錯刃成齒列直
斜隨墨絃來去霏輕屑儻遇盤錯間利器乃能別

刮板

廣舌橫短柄雙環繫長紉却行作斂蹤前排如擁盾起

偃作陂塘分田立畦畛人間不平地所到略能盡

擊壤

泰和民如何戲適因塊壤相從雜推耄峙立越尋丈乘
平初側一得雋終殺兩徒歌足歡愉至意自融盎帝力
既不知大德日蕩蕩爾來幾千年古俗遂長往雖云遺
制在淳風邈難想誰能陶真樂返古如指掌懷哉壤父
歌三復有遺響

油榨

巨材成椀牀細溜刻槃口麻爛入重圈機械應心手取
之亦多方脂膏竟誰有回顧室中婦何嘗潤蓬首

土鼓

粵昔伊耆氏樂制惟土苴繼自神農氏作鼓正從瓦崩
桴一引擊真性足陶寫當時風俗成往往朴而野大音
能希聲調高和誠寡迨周因用之歛合豳頌雅祈年及
祭蜡齊敬格上下是雖器質略名亦不徒假花腰鳴且
急可以愧來者

蠶連

前朝繭如山今朝卵如粟如山今歲謀如粟來歲足來
歲一何神生花楮一幅丁寧語荆婦依時勤曬沐

御選元詩卷十五

謹案第十五頁前三行湍飛稍旁激盤渦散驚濤
刊本驚訛飛據貢奎雲林集改



總校官庶吉士臣侍朝

校對官檢討臣蕭九成

謄錄監生臣周元

欽定四庫全書薈要

集部

御選元詩卷十六

詳校官原任主事臣李斯咏



欽定四庫全書薈要卷一萬八千四百二十八

集部

御選元詩卷十六

五言古詩五

虞集

諼草生竹間

諼草生竹間翠色相綢繆美人欣有託君子故忘憂昔
聞有鳴鳳飲水來丹丘不食衆木實樂只淇園秋

月出古城東

月出古城東海氣浮空濛車騎各已息宮闕何穹窿牧
馬草上露吹笳沙際風帳中忽聞雁傳令穀雕弓

書上京國子監壁

神京極高寒幽居了晨夜雷風無時發零雨每飄灑炎
光不到地蕭爽度長夏大化漠無宰豈必事陶冶揚雄
不曉事守道棲棲者元經百無徵白髮謾盈把

至治壬戌八月十五日榆林對月

日落次榆林東望待月出大星何煜煜芒角在昴畢草

樹風不起蛩蛸絕啁唧天高露如霜客子衣盡白羸驂
齟餘棧嫠婦泣幽室行吟毛骨寒坐見河漢沒驛人告
晨征曈曈曉光發

憶三十年前與元復初參政同賦秋日梨花有
句云朝食葉底梨暮看枝上花而忘其後句因
續之云

朝食葉底梨暮看枝上花花開食實後霜風振長柯遠
水良可鑒彩雲亦易過念爾白於雪日暮當如何

李老谷

十轉山崦交九度沙磧溜始辭平漠曠稍接山木秀老
病畏行役慰藉得良覲秋嶺晚更妍寒花晝如繡故園
夫如何朝陽眩霜袖

泰定甲子上京有感次韻馬伯庸待制

翰音迎日轂儀羽集雲路寂莫就書閣老大長郎署為
山望成岑織錦待盈度我行起視夜星漢非故處

天歷戊辰前續詠貧士一首

目昏畏附火枯坐寒窗中破褐著絮重虛豆兼冰崇病
骨於此時浮屠屹撐空呼兒檢餘歷記日待春風雖欣
解凍近翻驚紀年窮貲酒欲自廣無錢似陶翁

後續詠貧士三首

老骨寒不寐夜長況聞風心悸危欲折跼蹐敗絮中雞
鳴當晨參馬疥芻不充山童衣百鷄喚之媿息息求火
埽木葉庭樹亦已空決起不敢怠曙光屋南東苟遂牛
馬性歸放春草豐

歸蜀越關隴棧閣危登天適越河濟隔堰水丈尺間飢
寒迫旦暮舟車計茫然東家有一叟欲去初不言早朝
聽詔畢喚馬闔闔前童奴受宿戒向煖爭相先聞之嗔
兒子我何為汝牽屨無千金賈吾足安暇憐

為政貴察色讀書在研覃司視既不明兩者無一堪尚
不遑吏責為師固宜慚聖世無棄物况茲久朝簪決去
豈我志知止亦所諳頗聞南山下菊根浸寒潭濯餌千
日期冰臚復清涵老馬果識道更服鹽車驂

赤城館

雷起龍門山雨灑赤城觀蕭騷山木高浩蕩塵路斷魚
龍喜新波燕雀集虛幔開戶微風興倚杖衆雲散

同閣學士賦金鴨燒香

黃金鑄為鴨焚蘭夕殿中窈窕轉斜月逶迤動微風綺
席列珠樹華燈連玉虹無眠待顧問不知清夜終

退直同柯敬仲博士賦

月下白玉階露生黃金井疎條棲鵲寒衰蕙流螢冷戀

闕感時康懷歸覺宵永晨鐘禁中來白髮聊自整

題儋耳東坡載酒堂二首

翳翳儋耳城歷歷枕椰樹百年遺故丘新堂設賓阼清
風海上至朝陽在庭戶丹山五色鳳覽德屢來下甘辛
熟桂酒羅列雜諸贄符黎多孫子食飲祭先具蛟龍波
浪深歸來風雨除

鑿井得甘泉渴者恒自私流潤不擇地委順復何疑海
南絕風雨水木况華滋鄰舍解讀書諸生還誦詩何必

懷故都聊樂宜在茲星河度白鶴山月懸蛾眉來晚去
何速勞人千載思

記子昂畫

春風動蘭葉庭戶光陸離言收竹上露石角挂練衣車
行不擇路茅茨何楚楚遊子憺忘歸徘徊歲云暮

送西臺治書仇公哲

陝郊得時雨生意始來復存者事稼穡還者葺牆屋安
知彫瘵餘政可致新福闢除正廣術區井表深瀆均齊

定恒志忠厚保敦篤豈無憂世士受仕在芻牧為義苦
多違好名常不足治書肅將指善類庶有勗

送張道士歸上清

白雲時水上自古多仙人手攜綠玉杖頭戴白綸巾袖
中出風雨天上禮星辰歸來庭戶靜芳草自生春

贈寫真佟士明

佟郎居上京閱人如風花拈筆寫其似千載留英華邇
來七十年將相紛在目來者有如此往者那可續昔我

初北遊面白鬢如鴉點染煩粉墨華星映丹霞今如雪中松苦硬雜蒼白却視當年容邈如不相識不識當如何臨風且長歌黃雲接河漢白雪漫陂陀乞身願歸老吳蜀山總好贈君千黛螺翠色秋可埽

寄陳衆仲助教上都作

學省足清晝詞垣驚蚤秋美人隔河漢落月在高樓持衣未成曲吹笛不勝愁還趨鵲觀別製鷓鴣裘

贈鐵菴道者

昔遊雲臺觀山色上衣青松花春雨落柏葉秋露零飢
來煮白石睡起看黃庭人間忽已老莫問少微星

題商德符華山圖

昔祠雲臺館行穿御階柏夕陰嵐氣深重碧照行客獨
訪張超谷漸覺巖險迫冰生玉井頭日射仙掌側豈無
鐵鎖懸翻身若飛鶻恐煩華陰令不柰昌黎伯王事况
有程車馬何忽忽流觀終南山周覽天府國爾來十七
年欲往不再得山河想邈悠傷殘轉蕭索摩挲商老圖

彷彿希夷宅高哉蓮花峰白雲澹秋色

賦茅山道士雲松巢

昔年李太白廬山思結巢褰雲自天上和鶴止松梢道
士潘閒遠高居古大茅誦經門卧虎看劒石眠蛟飛步
脫鳬舄長吟吹鳳匏九江攬秀色許爾作神交

為范尊師賦雲林清遊

太茅千仞下結屋三四楹雲林戶牖潤鶴去海天平坐
上發長嘯人間聞玉笙斲苓春霧重煮朮晚煙輕綠室

噓丹氣蒼崖受日精
樵遺伐木斧真降引霓旌
九鼎金還就千齡樹不傾
問誰解居此云是范長生

送李彥方閩憲

并序

文監李公彥方出貳閩憲同朝羣公皆賦詩以為
贈彥方屢擢臺職激揚之宜有不待予言者適有
一事深有感於愚衷先正魯國許文正公實表章
程朱之學以佐至元之治天下人心風俗之所係
不可誣也近日晚學小子不肯細心讀書窮理妄

引陸子靜之說以自欺自棄至欲移易論語章句
直斥程朱之說為非此亦非有見於陸氏者也特
以文其猖狂不學以欺人而已此在王制之必不
容者也閩中自中立之歸已有道南之歎仲素愿
中至於元晦端緒明白皆在閩中不能不於彥方
之行發之去一賊吏治一弊政不如此一事有以
正人心儒者之能事也集卧病目眚尤甚援筆書
此云

七閩去天遠顛連苦無告牧人受深寄昧者覆為暴犀
象雜金貝飢渴劇飫膏大言相鄙夷饜奪心自校豈無
循廉吏實病黑白撓聰明屬旒黈聽熒資所到李侯金
閨彥圖史擅讐校晨聞大夫奏夕理武夷棹君子慎脩
職寧適豐廩稍蕉荔甘多毒薑桂老堪笔所懷延平翁
揚休似明道授受有源委精微足深討言立聖如在表
正愚可造師匠久不興真妄如柄鑒云何謂支離肆誕
長克傲異言古所誅末學足深悼閩雖在海隅前聞此

淵奧正誼從簡編良俗宜善導贈言不及他持此永為
好

題鄭秀才隱居

陶翁昔好菊荒徑不暇鋤素琴初無絃名酒亦屢虛雖
有二三子薪水不讀書淒涼千載下高名將焉如不如
鬼谷洞鄭子樂有餘種菊以為田田中更為廬善藥不
二價詠觴送居諸有子揮五絃涼風在庭除時來青田
鶴亦出濠梁魚昨者遊京師侯門曳華裾捧檄忽一喜

翩然告歸與芳蒲采甘露玉漿釀清醕
老父坐堂上稚子具籃輿晨遊南山陞
莫濯清水渠席間撫猗蘭房中詠關雎
以此得高壽何必南陽居

題朱邸竹木

猗猗淇園竹結根磐石安枝幹相扶持
風雨不可干其實鳳所食君子思保完
恒恐聲影疏蕭條霜露寒金玉慎高節
千載承清歡

賦蘇伯修滋溪書堂

滋源恒伏流春雨川乃盈林疇廣敷潤草木俱繁榮臨
深見遊儵仰喬有鳴鶯君子樂在斯齋居托令名積學
抱沉默時至有攸行抽簡魯史存采詩商頌并禹穴追
馬公湘江歌屈生紉蘭不盈握伐木有餘情浩然欲浮
海歸興還濯清方舟我為揖白髮媿垂纓

送張兵部孟功巡河分題得屋上烏

花發上陽春門開未央曙城柝起羣棲流光散朝羽息
影須近檐結巢願當戶轆轤轉金井終日濯嘉樹

賦得水木清華亭

中流泛蘭柁望彼嘉樹林落日蕩野水浮雲生夕陰游
魚戀芳藻好鳥鳴幽岑為樂恐易老吾將脫朝簪

于仲元舍賦紅梅

白雪不成夜丹霞遂崇朝妙質承日映飛英向風飄醉
來紅袖近歌罷綵雲消揚州問何遜何似董嬌嬈

滕昌祐懷香睡鵝圖

蒼鷺惜毛羽宛宛卧春雨雨餘日照沙上有懷香花懷

香不自獻夢到金鸞殿殿池多躍魚君王方草書

題汪華玉所藏蘭亭圖

衡茅負晴旭有客至我門共披會稽圖山水盛繽紛衆
賢坐水次飛觴泛沄沄夷曠各有趣高閒知右軍幽情
付後覽陳迹感前欣悠悠千載來不異更旦昏探穴問
神禹望海悲秦君逝者皆如斯死生固奚云所以鼓瑟
人思從童冠羣春服沂新浴歸歟聊永言撫卷不知老
遐思在茲文東南極積水日暮多浮雲

玉隆留題

仙真治茲山重阜隱延廣沖奧元氣會運至法靈響與
世作司命神宇廓宏敞及門春雨來元感副夙仰摩挲
晉時樹託身何蕭爽千載抱微息日月共來往欲為黃
髮期日待紫芝長上天垂光彩月出江海上海上故人不可
待惆悵理歸鞅

記夢

夢行衡廬間千仞過蒼壁崇高仰神明深廣下不測雲

雨蓄盤礴時至如欲出綑緼尚回旋揮霍忽奔逸物怪
匿巖穴慄若俟霹靂黑波汎高樹木葉走崩石升身登
元間縱觀龍變迹俯視九州野草木有輝澤乃在風雨
外手畫素三尺揮豪極動盪落墨更沉鬱圖成示坐人
共笑不可得顧瞻以踟躕恍惚增歎息因之命肩輿出
門聊有適大術何舒舒白鶴從數客略經幽澗濱便上
青松側憑高望遠水雙景蕩虛碧拂石共客坐芳草藉
尻膝忽然聞鐘聲睡覺北窗席

和陳溪山韻

幽人慎素履古道思獨往
瞋目登高臺浮雲不足上
丹砂煉仙骨沆漑濯神爽
遠懷澄江靜耿若孤月朗
河漢自傾注山川邈遊想
斂迹倦飛翼歸畊故時壤
好風從東來空谷感遺響
詔書薦遺逸郡府屬高仰
聊持東湖水往助敬亭賞

楚石琛藏主自蔣山歸却欲就叢林閱藏同舟
清江之上賦此贈之

手攜北山雲却上西江水月明洲渚生葉落風不起虛
舟不移棹寒波釣金鯉銀漢轉碧落北斗去天咫龍吟
匣中劍虎躍弦上矢殺機誰敢當吹毛豈輕試貝葉啟
千函木榻脫雙履惟應勝辟觀悠悠度年歲

秋山行旅圖

春夏農務急新涼事征遊飯糗既盈橐治絲亦催裘升
高踐白石降觀索輕舟試問將何之結客趨神州珠光
照連乘寶劍珊瑚鉤乘馬垂首背縱目上高丘策名羽

林郎談笑覓封侯太行何崔嵬日暮摧回輶古木多悲
風長途使人愁羸驂見木末足倦霜雪稠谷口何人畊
禾麻正盈疇出門不及里酒饌相綢繆壯者酣以歌期
頤醉而休安知萬里事有此千歲憂

題張希孟凝雲石

海石不盈握隕然如委雲危岑集遠思虛竇棲微熏天
高太華斷日出香爐分几硯襲清潤文章互網緼潛雷
起神谷震驚天上聞亟視恐無及化為九龍文

送豫章熊太古兼寄蘇伯修參政

豫章有家學禮樂不見收為養不擇祿淒涼向炎州攬
結桂樹枝誰為玉雪謀十年一再見我老君白頭古劒
光陸離繫以珊瑚鉤激昂文史間未媿班馬儔蘇君天
下士定價琳瑯球江漢方渺然為我觀素秋長吟以相
送明月在高樓

楊載

雪軒

北風海上來大雪何壯哉上下九萬里洗淨無纖埃君
家十二樓軒窗洞然開吹笙擊鳴鼓呼賓與銜杯名言
落四座大笑聲如雷舉頭望長空高興驚冥鴻仙人五
六輩飛下白雲中粲粲明珠袍相從萬玉童問君何所
事未就丹鼎功翩然却攜手共入蓬萊宮

桶底圖

巨鼇奮其首戴山出海中神人擇所處共構金銀宮凭
高開戶牖屈曲互相通女仙七十二顏色如花紅一一

執樂器奏曲殊未終世傳桃源圖共徵彭澤翁此本出
異士雕刻尤精工天地極廣大為地當不同我願學仙
道積久乃有功鍊形去滓穢五色浮虛空一朝乘風去
浩然入無窮

次韻景遠學士立春日二首

大雪入歲暮其兆為有年漙漙始彌旬父老怨苦寒平
旦上馬去重裘忽如單况彼牛衣子束縕噓微煙賴有
固窮節猶念及古先

人事重名實趨向盡百端丈夫負雄氣動欲追古賢於
意少不愜自放江海邊登高望八極雲氣生我前萬事
何足問所須惟酒錢

偕虞伯生魏雄卿魏池燕集分韻得閣字

侯家有貴客置酒燕池閣溽暑方盛極風雨俄大作移
楊相簸蕩蒲荷紛偃薄亂叫失蛙黽回翔迷鸛鶴街流
汙穢盡竇湧波濤惡喧聲劇降殺神氣欣洗濯趣歡爭
酬酢獻笑雜歌嘏益弛劒珮嚴未厭觥籌錯調燮維理

得滲漉宜施博和澤布原野濕煙散城郭嘉蔬已菁菁
良苗常濯濯吾徒家食餘豫有豐稔樂

題金壇宗氏自怡軒

白雲生何許萌芽自山石厥初僅毫末須臾大充斥蔓
延塞虛空日月為昏匿或時為霖雨庶類蒙潤澤或隨
飄風散起滅竟無迹相緣千萬變發色黑青赤畸人飭
棟宇遠俗喜幽閑開軒納高曠撫翫自怡懌人情慕富
貴驅逐不暫息轉盼失故常在已何所得上下數千載

往事猶歷歷於焉服聖訓無用苦沉溺昔年陶隱居常
作帝王客挂冠神武門作詩寫曾臆超然處物外可謂
貞且白何以企若人鞠躬脩道德

礪松為丁師善作

礪松高百尺磊落多大節連根抱危石古色黑如鐵隆
冬方冱寒山中積霜雪蘿蔦悉枯死蒼崖猶凍裂此時
惟老榦峭直不摧折國匠求美材瞻望歎竒絕險阻不
可致既作復中輟我願驅六丁操斧隳竭孽得此棟梁

材持以獻天闕

雪後次韻鄭集之

雪後登高望江山信奇哉重岡起且伏相連白皚皚水
官方謝事雲氣雪然開六龍翻滄海赤日從中來萬物
將蠢動忽如登春臺木行味正酸含菱先屬梅天時亦
相應初昏占斗魁遨遊自茲始入林踐蒼苔西湖青澗
澗西山高崔嵬長松更千載老枝多折摧名僧初精舍
靜謐依巖隈伊予實放士正可誅蒿萊情深惟痛飲毋

客發新醅家人欲求我但見白雲堆機心無自作可使
絕嫌猜君辭如泉涌我醉如山頽卜居同里巷時時得
追陪為瓶或先罄此恥當及壘大雅歌治世其音不宜
哀有倡必有和愧我非長才美哉春雲篇雲漢共昭回

次劉師魯韻

三年客塞上日夜懷舊丘飢來迫我去何暇為遠謀四
顧無一親此身如羈囚悲風動沙漠回首令人愁道路
已漫漫歲月復悠悠丈夫四方志至此何所求買船發

河上河水亦南流攜鉏理荒圃吾疾日已瘳飛雁至江
潯北風天始涼是時禾黍登斯人亦少康皇天降厚德
胡為私一方燕趙及齊魯人飢或相戕柰何有積廩如
陵復如岡生非肉食者此憂心甚長亟謀樹皋壤翦茅
覆小堂我志亦易豐歲祀有特羊

次韻袁伯長

盤盤海底石並樹青琅玕至陽生至陰龍宮常苦寒揚
光炫朝彩吐氣蒸微瀾根株歷千載莫測勞悴端端如

巢居子草木皮衣冠超然去人羣取友蹄與翰日誦黃
帝言浩歎淚闌干奈何天下治必以雲為官佩劔黃金
環咀丹白玉盤自聞至人德積熟生肺肝黃塵日暮起
對面不相看三山在何處使我師王韓聊歌紫芝曲倚
君清夜彈

題屏風畫商山四老人

飛雪灑遙野衝波蕩無垠蟠蟠山谷間居此四老人下
為民庶師上作王家賓清風眇何許馳想寂莫濱

遣興偶作

春蔬茂前畦
菁菁有顏色
珍禽叫深樹
過耳亦一適用
是易吾慮毋
為自縻積放浪
天地間無今亦
無昔古人得意
處相與元不隔
如何故人心未
照我胸臆微言
及纖芥實出左
右力豈憚決係
蹢人生且為客

書懷寄杜原父二首

吾生何為者
穉年志頗高
神仙與功名
壯思躍秋濤
中宵豈無寐
悲甚幾欲號
後來失所養
百數患難逃
竭力

奉甘旨出入身甚勞舊書益遺忘九牛存一毛稍後與
人事忍情如忍刀旦夕自惟念未足非兒曹常欲力道
德屢失迷所操區區習蠹簡對案夜焚膏儻然有所得
中心樂陶陶忽如從古人握手共遨遊攜持亦何事庶
用娛蓬蒿追思作詠歌示之必賢豪丈夫生世間毋論
賤與貧夙發多意氣往往惟任真松柏生高岡挺然固
出羣不為霜雪阨不為風雨春得時可行道節義亦足
伸吾生託下土所識凡幾人窮交獨相慰笑語亦復親

遙望山下雲旦起迷羣岫老鶴巢其中縹緲標末構長
鳴對秋月鳴罷復俛味散入墟落間聞者莫能究顧惟
雲外客娛心飲醇酎於此何如哉吾亦有所邁往來常
汎舟滌流浙江上是時秋風高濤水日夕壯瞬息踰百
里猛捷莫可狀倚船縱觀久力可騎鯨况顧謂吾友言
為樂頗豪放斟酌尊中酒懷抱益虛曠常從山中遊實
愛巖谷幽長松蔭泉水四時清如秋佇立輒良久忽欲
忘其儔吾聞古來人山居多名流此語或可信市朝安

得留

贈執中允上人

南山多白雲，澶漫塞崖谷。中有龐眉叟，寂莫卧林屋。前
門樹高松，後戶植幽竹。孤風相纏繞，波濤驚蕩沃。梵文
五千卷，誦說盡精熟。時時發清唱，鏗鏘擊金玉。伊余走
海內，一見輒歎服。願言從之遊，澹泊心自足。

范梈

送張鍊師歸武當山

張君瀛洲人來作武當客始來武當時祇著謝公屐弟
子百數輩稍稍來服役誅茅立萬柱空中現金碧辛苦
三十年夜卧不側席以之律鬼神故亦如矩墨元年踰
冬旱失火燒四國野谷方焦燉六月畿甸赤朝廷亦不
愛犧牲與圭璧僵巫暨億史歌舞無消息君時待詔來
公卿初不識一朝傳天語問以濟旱策君云臣鄙愚造
化非所測陰陽有開閉此實智者責公卿復致辭物生
今孔棘已勅京兆尹取足輸粟帛此如解倒懸祀事惟

所擇君聞猶固讓心實內憂惕飛章白玉闕瀝膽殫悃
悞臣實才淺劣臣實學迂塞臣有一寸心願輔后皇德
后皇本愛民民今旱為厄或者罪有由皇亦重開釋祈
謝各有方咒禁各有式上堂薦明水下堂考金石夜分
請命既昧爽大施設為壇東市門經紀法靈冊庭中元
武旗飄飄墨黍黑君臨一揮手怒髮上霄直指麾東方
龍卷水東海側指麾西方龍卷水略西極北南暨中央
各以方率職某日某甲子漏下五十刻我在壇上伺不

得忤區畫豐隆與飛廉列缺與辟歷汝將汝風馳汝遣
汝雷擊汝雲馮勿滴汝雨必三尺汝不從誓言不畏上
帝勅至期果響荅動盪七日澤常時人所難君若不以
力公卿奏天子是必有褒錫可以寵號名可以蕃服謁
君曰天子聖卿從誠所格臣敢貪天功况乃歸計迫昨
得山中書至自青溪宅向來百弟子遲歸在朝夕暝時
冬序半霜下木葉積明當課斬伐結構西巖辟山田晚
報熟芝朮及採摘獼猿長如人夜夜盜柿栗隄防苟不

豫六氣盡蟲賊公家事既已私事容棄擲方知用世士
遺世等糠粃所過如虛空焉知去留迹我持一瓢酒欲
以贈遠色歲暮不見君悵望空中翺

贈馮鍊師歸岳陽

王子吹笙侶精神如九秋蹙攜碧山屐遮獻帝王州江
湖未識面寄語旋鳴騶夏雲逼幽澗春鳥啼芳洲行色
當及春景氣適惠柔眷眷將歸客勝日懷林丘何時謝
燕闕亦得西南遊洞庭木葉下期爾岳陽樓

蒙恩供奉翰林未行改佐閩幕自豐城便道取
疾繇撫過盱與郡守薩侯會約尋麻源不果明

日別盱

暫遠雲霞觀却希山水音珠星聯極下璧月動江潯始
集寶氣亭復趨金晶岑馬飲樹連澗猿啼風滿林揚瀾
思汗漫睇嶺寫嵌崟輟擢更垂釣推書時弄琴石門生
夕景麻源籠曉陰是郡遇賢守佳致契幽尋樽俎迫清
好絃歌彰古心郡中宜鳳集泓下或龍吟頗愧塵務逼

還為旅病侵一行
混吏軌千載負國琛
即往事莫究於茲
念方深姑山如有意
遂許一登臨

西巖夜宿懷雷州幕府同僚

月出萬籟靜巖宿紫煙深
解后逢清景飄蕭澄素襟
久辭蓬萊苑復憶嵩高岑
埽雪待白鵠凌霄看翠禽
如何較奇賞而此事幽尋
雖負簡書畏還希金玉音
徑暗泉移澗風疏星滿林
願持千里意空外寫瑤琴

贈安西王提舉別

車聲何軋軋去我亦翩翩借問車中人幾時到秦川秦
疆數千里西與雲棧連行人秣馬過猿啼上青天長安
古帝州宅土腴不偏聞君荅平昔宦遊祇晏眠十齡涉
文史十五懷家氊二十學壯遊五十綴朝聯奉常老掌
故今已二十年功業晚何就蕭蕭髮垂肩天子念逢掖
錫官頗靜便紫衣綰黑綬此是車中綠飄飄上都門白
馬錦連乾舉案招青山孟光老猶賢大兒坐車軒小兒
調馬鞭中兒又絕好國語荷珠圓旦夕俟君至買舍清

渭壩此皆足慰意日食官俸錢俸錢足養親親自有圭
田人生慕富貴富貴翻受憐不有鐘鼎食亦無膏火煎
前日三市事目擊心凜然當時氣凌人不得呵烏鳶觀
君浩蕩去萬事當棄捐孔子不西行及河軌再旋今君
涉河流西路方繇繇終南與嵩華是中多神仙仙掌出
浮雲上有三峰蓮真人玉拄杖挂在明月弦便當往從
之吸月升太元金鼎交龍虎使我神貌堅柰何二三月
百憂集離筵空花如錦機野色相交鮮楊花亂愁思萬

條散青煙我不酌美酒敬讓故人先
搥碎琥珀杯獨灑
春風前春風澹無言徒以別慮牽別亦無所慮所慮應
當宣願及相思時中腸鬱糾纏為吹雙紫燕銜書到君
邊矯矯蕭徵君珠貝藏龍淵一別如列星隨天夜移躔
鳳有五色瑞時下岐山巔請君問起居歸來定何年

宿夏莊

陰晴知何如開戶月滿地主家種長榆竟夕薰風至半
生朝市蹤頗負山林意及茲登覽餘亦復纏世累疎籬

臨大道嘶馬駭童稚衆卧復離披躊躇獨無寐江山轉
寥落星斗亦聯綴丈夫十載間豈獨鉛槧事

贈方永叔往教重慶路

汲水得明月倒影上青天客行三十年未識蜀月圓中
宵夢巴蜀秣馬辭燕服成都雖云遠未到意已足遠意
不可期宿夕宛見之雲迷飛鳥道雨急卧龍祠干戈何
草草祇說渝州好但得渝州官甘就渝州老渝州古雄
城彭君舊建旌至今江石上猶有古時名豪傑世已矣

空城俯流水復有江東人來教渝州士方侯天機深大
雅託遺音沉潛萬夫敵脫略五湖心翩然別我往長揖
仙人掌疾風吹大旗落日明斜舫即此少相知相知長
恨思巫山桂樹發折寄定何時

送吳真人持詔寧親

垂楊十二門旦旦羅鳴騶千騎萬騎中孰是違世儔美
哉吳夫子脫灑住丹丘氣涵羣象動思與萬物周天馬
出名駒逸態橫九州自從下地走但飲星河流明月落

中江倒影射斗牛飄然持玉節去犯蒼山稠紫鳳把細
華逶迤仙巖陬遂經三茅岑已登閣峰頭還家拜封君
玉珊珊鉤笑問游子衣不獨五色優門縣朱雀旂坐
擁金明裘開筵浥芳醴魚鮮進庶羞承顏開淑訓慰爾
道路脩爾歸奉天子萬歲更千秋番君大國壽賀老清
湖愁煙水三萬頃宮袍在扁舟荷花合古渡此處不夷
猶雲錦雙鴛鴦悠悠戲汀洲東風長年來揚我闌檻幽
白馬絡金羈柰此甚盛休儂家閣峰下霞竹數稻疇鶴

集偃松雪青雲互綢繆自從干戈餘川岳秋蕭騷骨肉
倚四海風雲擾吟謳聞君復此去浩蕩懷今遊罷酒黃
鸝鳴高花豔城樓良辰難能別嘉會易為酬至樂夫子
行子行無滯留

散步還南軒

幸自塵鞅絕起游欲何之江遠夕氣澄開軒納新詩莎
雞振陽砌蟪蛄結陰池珊珊修木靜宛宛好風遲桃杏
競秋園旋隨時草萎寧不悅生植肅殺乃其宜于斯見

發育及深霜露思嵇康本達節竟受薄俗嗤快哉東方
生嘲哈得吾師

度澤過關山

單車度大澤有似遊梁山初飛雁驚徒辱在葭葦間季
冬陰風盛雨霰紛珊珊念我離大府行役何時還朝臨
昌邑浦夕指番易灣衝泥赴農邨老屋夜不關然薪設
供帳風味猶百蠻蒸烘濕衣裳徒御相廻環極知道路
難猶念奔走難傳餐逮明燭飢渴未容慳春和理稅駕

且以慰衰顏

和荅楊茂才

始我南山居與子共朝夕服事子尊君德義藹夙昔焉
知二十載萬變如頃刻漁釣負平生浩蕩隨所適進慚
負官義退愧尋幽迹而此山水間時勤問消息夜深款
巖扃蘿月在屋翼清言溢前聞子學日有力世好將未
忘相資庶有得

春雁

磬磬九春雁整列鄉天端雖念洲渚幽已違霜雪寒羣
行旅陽土亦為稻梁難啖食曾未充知時詎能安銜蘆
領孤雛蕭蕭理羽翰明年還當賓勿與中路歎

二杏

北鄰杏一株身作龍盤拏直上青天中虛空高結花南
鄰杏更好枝幹相交加三月二月時匝地堆紅霞自我
來京城寄居諸公家其地僻且阻茂樹繞窗紗亦有桃
與李盛節爭豪奢雖富無可人紛紛亂如麻晚遇此二

杏突兀超塵沙嘗時好客來立旆遙咨嗟欲去復顧戀
往往至日斜我昔直詞館羸馬道路賒晨往昏黑歸無
由領其嘉今我已投散終日猶枯查朝暮出見之百匝
虛簷牙而我又將去何繇報繁葩誓將適南郡辟地江
之涯種此一萬樹漫漫被荒遐花成實給食收拾歲盈
車此事亦易集但恐君疑誇

谷口散暑

谷口月未上漁火出橫塘門前面稻畦
鼃龜雜風篁童

非弄山墅今茲白髮長新歸稍結構日徯江海涼琴書
散衡宇藥物布滿牀謝告未緣衰以疾不得將維時仲
夏半織女當西堂常恐梧樹落莎雞戒衣裳平生荷耒
志經歲失豐穰此行庶無負海內膺時康

將赴江淞大府校進士試會疾止建安驛上後
山東眺郡城作十二韻

青雲建安郡人物故鍾秀承旭開芳樹凌虛列遙岫溪
聲涌夜長石角吐秋瘦漁沙府圖識仙室川浸溜征塵

汨炎毒服事彌奔奏淡淡鴻鵠舉蒼蒼鷹隼候山英茗
在淪館飯菰登豆勤渠相國誼忝竊大夫後顧惟論賢
能奚取推寡陋吾欲救五丁雷電激宇宙疾飛移萬壑
及此洗昏疚起為梅子真南垓埽丹白

八月十五日公堂讌別作

悠悠我行邁去此粵山端遲明駐征車爰盡公堂歡開
顏俯城郭簫鼓集儀鸞謂欲戒醉飲重此良辰難關門
集會府僚友並征鞍更辭無別語但祝長加餐役者四

五人相從出林巒亦復路傍泣豈獨殊肺肝况我離慈
母朝暮偵平安送行各如許焉得不辛酸

秋日海康齋居

吟事久已落茲晨遇高秋泠泠空中籟襲我書帷幽如
何寒暑疾徑與大江流江流不復轉歲月已還周遊子
去京華邈在天盡頭秋雁不踰嶺眷眷非良謀排雲挹
飛觀金爵露光浮在遠心所仰胡為滯滄洲茅屋足花
草洵美難久留苟能一吾志斯道將何憂

曉出西郊

自春已及夏歲籥寢中更平旦西郊道始聞啼鳥聲川
晴樹氣嘉夕露枝條盈西峰近在眼白雲夾路生一從
違夙昔好懷鬱難并未知高世意忽復何以營屠狗與
漁釣俱足成大名卓哉箕穎客使我抱深誠

秋江釣月

秋江明似鏡月色靜更好之子罷琴來蘿徑初尚早衆
峰更滅沒橫笛隔幽島我船爾棹歌絲綸蕩浮藻潛魚

却寒餌宿雁起夜縞離離不可招白露下煙草高風桐
廬士峻業渭川老同是釣魚人那應不同道把酒酌清
輝如何答穹昊

出甘蕉州

清雨氣候變移船孤石灘已行千里餘始驗初冬寒暫
解霧露毒稍知江山寬新人異言語故事同憂歡思昔
夏后氏封建天南端伯業起勾踐世遠子孫殫無諸佐
大業遂作漢王官身受閩君策白日海澄瀾至今崇臺

上列戟綯衣冠古來樹名節於此事常難惟有精英在
青霄明羽翰

四月八日訪閩粵王無諸古城遂至蓮花峰下
僧寺寺乃唐王審知祠

維夏氣清宴原藪樹龍蔥上弦適休暇游詠紫煙中石
澗演新流山苗含惠風肥苧膚隱白崇榴葉張紅撫節
警代謝未歸憂心忡承官勘政術但覺祿養豐句稽困
日月始得如游驄觀省職何補庶望禪至公遺丘隱莎

草廢刹在空濛而况塵境事斯理固有終

苦熱懷楚下

苦熱不可極念此西南風誰云灝氣遠乃在庭戶中我
家百丈下井上雙梧桐向夕集歸鳥未秋足鳴蛩自從
別家來江海信不通宛宛維桑思願從孤征鴻夜夢白
髮親歡笑攜穉童倚門望子歸未歸憂忡忡東皋無良
田何以待歲豐盛年將稱意無為學轉蓬

明月幾回滿

明月幾回滿待君君未歸中庭步芳草蝴蝶上人衣誰
念同袍者閒居與願違

蒼山感秋

蒼山秋意長池館靜而悶雨止脩竹間流螢夜深至皇
羲世云遠雅頌日凋弊舉手遏頽波誰識作者志烏啼
魯東門泗水不染袂後去三十年直可肩聖知機關繫
風化詞語特細事月落閉虛簾坐夢太古帝揚眉頽玉
色盡發養生祕勿謂仙學難此道可立致

酬申屠子迪

碧月出海底挂在青天中美人如明珠滄波思無窮身
非千歲蓬欲逐萬里風願因紈素衣託向孤征鴻

節婦王氏

妾年二三四始識月團團十二學女工刺繡如鴛鸞十
九嫁夫家事姑施衿鞶夫壻良家兒世籍為王官雖聯
朱紫貴不習綺與紈過庭執詩禮開口若驚湍風儀在
一時爭作玉人看天地忽降毒摧折青琅玕回首四十

春景光若流九貞心守松柏芳性軼芝蘭落月簾帷曙
西風機杼寒沉思往昔事淚下紅闌干豪客至茅屋舉
家竄林巒入房衛病姑身死白刃攢相向義憐釋視死
色無難親知為歎息保社為辛酸欲與上州府為妾旌
門闌妾實無所願所願在所安婦人往從人阿母涕洟
瀾送行遺之語敬順無違歡匹偶固有時寧知憂患端
辛苦蹈物變豈羨身獨完殷勤謝舊故聞者摧肺肝

遠遊

遠遊非吾志偶墮天一角去就亦有期寧能計今昨料
理貧居士守書負西郭清心見古初德宅甘寂莫杜門
坐春深綠竹解寒籜雖無清時賞幽意各有託千載非
長生松喬未足學焉知勾漏令不厭宦情薄山中歸去
來朝霞可以酌

揭傒斯

正月十二日尋盧學士船至漢口留詩為別

晴江澹微瀾曳雲在曾巘參差連舫出散漫羣鷗遠始

知遵漢廣遙睇高旆卷懷賢每忘賤臨流亦忘蹇蒼茫
景將入窈眇春猶淺新知遽相違餘悰何由展

別武昌

欲歸常恨遲將行反愁遽殘年念骨肉久客多親故佇
立望江波江波正東注

春日雜言二首

羃歷楊柳枝蒙茸春草齊夭夭誰家婦采桑臨路岐零
露沾其裳蛛絲卷其衣樹高身苦弱蠶飢行復遲辛苦

事姑嫜宿昔減容輝見者皆歎息此心知獨誰良人日暮至醉問爾何為

五歲能讀書十歲能賦詩十五事遠遊三十無所為既乖俯仰責復為鄰里欺生計日已疎世態多瑕疵煌煌金張門徒隸皆光輝日晏賓客集軒車如風馳一笑擲千金片言委黃泥齊生獨抱瑟來往何逶迤

遊麻姑山五首

并序

湖北憲使程公閒居盱上二年矣五月二十日詔

拜翰林學士又十日公與使者及諸客同遊麻姑
山輒以覽歷所至賦詩五首

雲關

君子荷初服恩至若無榮穆穆芳雨散悠悠蒼山行危
關擁霧黑飛術緣雲青苔蘚滑如積杉松宵冥冥時逢
負苓翁忽聞流水聲舉足向益高矯然欲遐征徒隸各
忘倦矧彼彼高人情

飛練亭

神工擲天紳挂之兩崖間萬古輸不盡誰能測其端勢
割山石愁氣挾草木寒安得天風吹繫彼日月還麻姑
綠雲髮黝黝長不殘

湧雪亭

泉源出地底仰向雲中行擘崖瀉千丈亂石皆騰擥風
霆日夜急雨雪虛空明不有神物扶茲山應久傾噴薄
側飛鳥砢訇愁百靈仙家信為好喧聒何由平

三峽橋

兩山東飛橋下塹不測淵誰開萬尋鐵逗此無窮泉淙
淙輒空曲洶洶投奔川陽光下照之忽作龍騰天常恐
桑田變中有瞿塘船

麻姑壇

嵯峨仙都觀遙望丹霞天後有千歲松前有百頃田風
日夏颯沓煙雲晝蔥芊羣彥一時集安知非列仙持觴
起相醕罷琴抗高言天道信幽邈人情何拘攣靈君不
可致落景詎少延仰雖慚冥冥俯實憂元元主人顧坐

客此中可忘年

寄題馮掾東臯園亭

時雨散繁綠緒風滿平原興言慕君子退食在丘園出
應當世務入詠幽人言池流澹無聲畦蔬蔚蔥芊高林
麗陽景羣山若浮煙好鳥應候鳴新音和且閒時與文
士俱消搖農圃春理達自知簡情忘可避喧庶云保貞
和歲暮委周旋

京城閒居雜言四首

錄二首

朝從獵城南暮從獵城北白馬踰飛翰輕裘如膏澤塵
起知獸駭風高驗鳥疾隻箭落雙鷺千金出俄刻歸來
拜恩寵樂飲過一石僮奴增意氣賓客改顏色常恐文
法士輕薄多瑕擿高門臨廣衢秋風上荆棘

朔土高且厚生民勁而彊榆柳雖弱質生植益繁昌桃
李大于拳棗栗充餽糧誰謂苦寒地百物莫得傷青青
雲夢竹夙昔傲雪霜移植于此庭不如芥與楊竹性豈
有改繇來非本鄉

山水卷

稍稍雲木動藹藹煙峰亂遠浦引歸橈雙崖臨絕岸方
思隱淪客欲結漁樵伴水閣山更遙幽期空汗漫

雜詩寄彭通復

脈脈我所思彭氏躡遐蹤婉婉若處子未曾出房櫳相
望四千里踰年闕相從五月君寄書九月達京中我書
欲報君書到歲已窮豈不懷繾綣無由覲君容參差天
際雲縹緲乘朔風羽翼不吾施翩彼南飛鴻君有高世

行我無適時功天命人得違出處諒非同

送周山人之遼東

物變風已暄庭虛雪猶在每與君子違偏驚歲年改名
山先夢到靈藥隨方采明日望行人雲搓隔遼海

贈王郎

王郎楚狂士意氣飛秋霜讀書一萬卷下筆數千行富
貴視浮雲况肯矜文章十五恥閭里掉臂辭故鄉夜宿
東海月朝買西州航瞋目王公前結客少年場一飲或

一石一醉或一觴寧揖屠狗人不與俗士當千金不易
笑歲暮單衣裳阮籍在窮途英名連四方鸞鵠有時鍛
反媿燕雀翔世無劇孟交不及青樓倡燕趙如花人翠
袂黃金璫不識豪俊士空媚癡與狂王郎遠過我坐我
枯藜牀終夕無酒飲撫髀歌慨慷平明別我去極目空
茫茫

吳子高歸岳陽

都門落葉滿遊子去京畿忍聽離鸞操遙逐秋鴻飛愁

霜曉入鏡淚雨夕沾衣煙樹黃河岸風帆采石磯平沙
迴渺漫寒雨暖熹微客心閒轉切鄉書近却稀夢聞兒
女泣行將僮僕依竊慕漆園放誰云潘岳非乘濤慣不
險迴江望若圍武昌未易到更向岳陽歸

寄題括蒼王氏東野二亭

畊雨

時雨布嘉澤羣物盡欣豫晨興集僮僕東野從所務鵠
鴈應候鳴鸝黃翔高樹衆草萋以出流潦被行路黽勉

勤微躬寧復當世慮義農不我待沮溺諧所慕食力隨
齊民常恐負空素眷言徇茲道卒此年歲暮

心遠

窮居豈予志無營得長閒翳翳三畝宅顧樂彼南山灌
木何蒼蒼雲鳥相往還已絕嬰世念况接仁里歡但願
黍稌登春酒恒慰顏羲和緩其轡萬物悠然安

奉仝柯博士甘內掾下直賦

暮出閭闔門解鞍坐前庭泠泠草露白華月隔林生蟋

蟀奮哀響鴻雁流遺聲常恐芳景晏不知寒節并萬物
肅將斂孤懷徒自盈捉襟激長謠淒泊諒難徵

賦得春雁送張郎中省覲揚州

東風吹歸雁離離翔天側朝發衡陽浦夕過陰山磧嘹
唳浮雲中萬里才一息眷言思親者相望有南北

送客省冷副使歸豫章覲省

始違山林賞復作遠遊客忽興慈母念辭帝去京國楊
柳河上春飄然就行役聞者為驚喜朋儔皆歎息昔依

禁樹枝今戀山巔柏世俗更推蕩日月有如迫歸雁羣
響哀遙雲孤飛白都門一尊酒落景淡行色以我留滯
心送君南征翮

三月三日奉陪憲使程公遊麻源第三谷宴藏
書山房白雲樓

明公富暇豫勝日懷登臨蹠蹠驄馬行窈窕幽人心懸
崖響晴雨奔流濯春陰雲門轉絕壑畫橋貫長林拂石
慨往運聞鐘知古音耆松有百圍突嶂踰萬尋小憩釣

魚臺聿瞻華子岑捫蘿入縹緲側徑臨蕭森上有百尺樓下有孤猿吟初筵俯層巔微風蕩危襟笑語定忘我觥籌浩難任豈不念永留惘然歸思深

黃鶴山聽雨得清字

元局息深構虛館含餘清瀟灑松上來瑟縮花間鳴遙兼夜析警細與寒更并懷親感離別撫物愧生成土思浩方殷春聲耿逾明幸及朋知好達此旦暮情北展非窮轅南山夢歸耕何言託毫素聊與款生平

重餞李九時毅賦得南樓月

娟娟臨古戍，晃晃辭煙樹。寒通雲夢深，白映蒼祠暮。胡
牀看逾近，楚酒愁難駐。雁背欲成霜，林梢初泣露。故人
明夜泊，相望定何處。且照東湖歸，行送歸舟去。

謹案第二十六頁後四行魚鮮進庶羞刊本鮮訛
解據范梈德機集改

第三十一頁前八行橫笛隔幽島刊本島訛鳥據
梈德機集改

第三十二頁後一行而況塵境事刊本境訛鏡據
范梈德機集改

第三十九頁前八行瞋目王公前刊本瞋訛瞑據
倡侯斯秋宜集改

[illegible]



總校官庶吉士臣侍朝

校對官檢討臣蕭九成

謄錄監生臣周元